

Takurda-o Yakubu

Rem-se ro n-me à:

M-zante 1:1

M-sheṛ ṽn ṽs-weeṛ ne 1:2-8

Ur-koob ṽn o-kwuṁ ne 1:9-11

Ur-me'es ṽn ṽt-meger ne 1:12-18

M-hoge ṽn m-nom ne 1:19-27

Nak ṽt-to be-de ṽn nom m-koos 2:1-13

M-sheṛ ṽn m-senge ne 2:14-26

Ko-wan-dor ṽn rem-de ṽn wu ne 3:1-18

Ko-wan-dor ṽn hono o-dak ne 4:1—5:6

Karamsa-ṽt hor-to 5:7-20

¹ Me **Yakubu**, ko-guṽ-wu Shir ṽn Yeso ne Wan-Koyan **Kiristi**.^{*} Me m-gas ṽn ka baag-ṽt op-ṽt yoor-to, to Shir to cakre ha-mo ṽn dak-ṽt hor-to à.[†]

Nom o-zak da-o ṽt-meger

² Or re ne, muut no ko to ke meger-to to koru no à, rii-yo o-zak deen.

³ Remen no nak ṽnze da-o a takse sheṛ-m no à, ka da-o joose-ur no he kum ur-hek de m-bo'ose.

⁴ Joose no har ur-ta, remen no waragté yo depe no warag à ṽn ko yo ke cow-yo, taase no taage ṽn rii-yo ur-bon.

⁵ Urege wu ken wu be-ur no conog ṽs-nap, wu kon Shir wu ro m-'ya ṽn kowan à, ko o ke da-o ṽn

^{*} **Bor-o gaan:1 1:1** Wu Shir daagne à. [†] **Bor-o gaan:1 1:1** Hyen komo: Mati 13:55; Mark 6:3; Seng 15:13; Gara 1:19.

men-ut gaan, wua 'ye wu. Da-o wu kone, Shir a kangsu wu á.

⁶ Amba kon o sher be-de Shir ba das das á. Wu ro das das à, ya wu ro untun jok-ye m-sa, ye yo-m ro m-huk mo mus ko ke so-se à.

⁷ Gon ka net-wu ro ka bo à, ¿re o ne wu he goks un rii be-ur Wan-Koyan?

⁸ Net-wu hur-de un wu wonge ut-yoor à, wu ro m-es ur-hi be-ur gaan á.

O-kwum ur-koob ne

⁹ Ko-yan-dor-wu rotte rii á, se wu nom o-zak deen. Wu nep unze Shir sepe wu kaane.

¹⁰ Kaane ma, ko-ya-o-kwum-wu nom o-zak, da-o Shir hente wu dak dak à. Remen ko-ya-o-kwum wua tees untu ut-mok o-kot.

¹¹ Remen ho-ur ro rwuun ne n-ton, komo reeten-mo un de ro m-bu ut-gwo to kek, mok-to un to ro m-zoose, komo bon-de un to naase. Kaane o ya-o-kwum ro m-ta, da-o ye ro m-senge un kwum-o un ye à.‡

Senge o re ur-ho da-o ut-meger

¹² Shir a hu nu-o ur-bon be-de un net-wu joose n-me un re ur-koob de un wu à, wua goks 'yons-de un hoog-o un ba m-ta o Shir swore o-nu wua 'ye ye wasse un wu ne à.

¹³ Urege meger-ut kumug net har wu ro un ma-to un nom un rii-yo **ur-ba'as** taase wu zee, “Shir-o megre me.” Remen Shir ro un meger un net un men ut-jaas to á, komo a hoks meger un Shir wu nomot rii-yo ba ur-bon á.

‡ **Bor-o gaan:11 1:10-11** Hyen komo: Isha 40:6-7 (ut-Girik).

14 Meger-ut ro m-hees un net da-o gop-de ur-hur de un wu rakse wu à, un ka be-de o meger-ut ro wu m-'wos.

15 Ka da-de gop-de ur-hur de nome ur-uub, de ro m-mat **ur-ba'as**, komo ka **ba'as-de** bo'ose, de ro wu m-hante m-mar.

16 Or re ne ye me m-was à, no jar no cuw o-kot á!

17 Myet bo un rii-yo ur-bon un yar-mo m-moka ne, mo un rwuun es-mo n-ton, be-de Shir. Wu nome o-Ton m-cecar ne à, ka cecar-mo ro m-barme amba Shir ro m-barme á, komo comb-o ro kon be-de un wu á.

18 Un con-mo un wu o, wu hantutu na n-me un gom-de o-nip, wu ye'et na hoog pu-o remen wu kumutú na be-de jiishe ur-bon à. Shir un nom kaane remen be-de un rii-yo wu nome à, a warag untun mat-de o-co un kap rii-yo wu nome à.

M-hoge m-nom ne

19 Baks no yo ka, or re ne yan-dor, Ko wu ke net-wu ma'as zongse wu hogute, amba taase wu nom hor-mo m-cep komo wu nom hor-mo us-ryaab á.

20 Ryaab-se un ko-hun se ro wu m-wen un kum un kashi un rii-yo Shir cone à.

21 Ruut no myet rii-yo ro m-hante **ur-ba'as** à, no yage nome un or no ne men-ut jaas-to. Ka da-de ne un gwugwer-mo ur-hi, no goks ka gom-de a yoosu no à. De ro ur-beeb ne de guut hoog-m no, be-de un swo un koob-de **ur-ba'as**.

22 Nom yo Ma-to Shir zee à, hogu-mo cot, ba m-nom á. Wu ro m-hoge ut-to temb à, wu ro o ka m-raks un hi un de un wu.

²³ Myet bo un net-wu hoge Ma-to Shir à, wu yage m-nom un yo to zee à, ya wu ro untun net-wu gwoŋe co-o un wu n-te ur-madipi à.

²⁴ Wu gusse wu hyenes bo wu ro à, bo wu komte gwot un co-o un wu à, wu ruuru n-do. Ujime deen á to-ut ka'uru wu bo wu ro à.

²⁵ Amba net-wu ro m-tuwe un Ma-to Shir yish, wu ro kaane á. Ka ma-to ro ur-be ne, komo to ro na m-ruut be-de un nom **ur-ba'as**, urege a m-senge un nom us-barag un to. Ba wu ro m-hoge to-ut ke wu á, amba wu ro m-nom un yo to zee à. Shir a 'ye wu ur-ho remen rii-yo wu ro m-nom à.

Dor-o o-nip

²⁶ Urege net ro us-barag unze wu ro m-nom un rii-yo Shir cone à, amba wu bop rem-de un wu be-de un ma-to hwaa á, wu ro un raks un hi un de un wu, dor-o un wu hwaa o.

²⁷ Yo Shir o-Tato cone a nom, wu hogute m-rerem à, yo ro a gu yakar-ye ro ba un tat-ne à, komo yo ro a reegte ne'a-ne ye campo-ne ye un ye mare à, ye ro un swo ur-koob à. Komo a dos ur-hi be-de un she'et-de un ba ur-bon de he na m-naas à.

Bor-us yoor

A nak ya-m-kute hun-ne m-koos ut-to

¹ Or re ne **yan-dor Yeso**, bo no shere un Wan-Koyan na, Yeso **Kiristi** wu ro wa-m-seps à, no jar no kute ye ken hun-ne ye m-koos á.

² A zee, ko-ya-o-kwum cok kwot-yo zinariya un saw-to ur-bon ne, wu cownuru n-me un morog-ur

no, komo ko-koob-wu un saw-ut naase cownuru komo.

³ Urege noa jiish m-goks un ka ko-ya-o-kwum-wu copne saw-to ur-bon à, no zee wu, “Deeg-o ur-bon o ka, she'et.” Amba no zeeru ko-koob, “Es reeno,” ko ne “She'et kane n-dak.”

⁴ No nome kaane, koos-mo ka no kute hi un no, komo no sha'ag o ka yan-m-piish ut-ma ye ba ur-bon.

Shir-o un deet un koob-ne n-ton

⁵ Raag no ut-to or re ne yan-dor, ye me m-was à, Shir un daag ka hun-ne ye ro koob-ne à, ye rotte rii á un hono o-dak, remen ye sheret be-ur Yeso **Kiristi** Wan-Koyan. Nip-o komo ye ro ya-o-kwum. Komo wu un daag ye remen ye reet ka gwomo-to wu swore ye cone wu à o-nu.

⁶ Amba no, no mus un koob-ne hwaa. ¿Ya-o-kwum-ye ka ro no m-mo, ye ro no komo m-heet be-de un piish ut-ma?

⁷ Ye ye ro m-cep un ma-to o-yo'og un jin-de un **Kiristi**. De a neptu no un de à.

⁸ A nom ur-bon, urege o dorute **karamsa**-o Shir ko-Gwomo na, o ro gense be-de un Ma-to un wu à unze, “Was un wan-bor-o ru ne bo o wase hi un du ne à.”* O nomog hond hond.

⁹ Amba no ro m-koos be-ur no, **ba'as-de** ka no m-nom be-de Shir, komo be-de o-**karamsa**, no yan-jet o-**karamsa** ye.

¹⁰ Bo un net-wu jete **karamsa**-o gaan à, wu ro un zonge to wu jetemte to o ka myet.

* **Bor-üş yoor:8 2:8** Hyen komo: Rewi 19:18.

11 Remen ka o zee, “Wo jar o-jar o-hoob ne'a-wu un net á,”† o zee komo, “Wo ho net á,”‡ Urege wo hoob ne'a-wu un net á, amba o hoog net, o jekt o ka **karamsa**-o Shir.

12 Cep no ut-ma, no nom us-rem ur-'won ne be-de un hun-ne, remen a nepste Shir a kutu na 'won-de un wu rem **Kiristi**.

13 Remen da-o un piish ut-ma, Shir a hoge 'won-de un net-wu rotte ur-'won á. Amba 'won-ur a re ur-ho un ho-de un piish ut-ma.

M-sheer ba m-senge hwaa o

14 Or re ne, wu ken wu zee, wu ro m-sheer ne be-ur Yeso **Kiristi**, amba wu ro m-nom un rii-yo Shir cone á. ¿Ya wu he m-kum? Ka sher-mo moa gu wu á.

15 A zee, or na ko-yan-dor campo ko ne ne'a, wu rott saw-to m-cop á, ko ne rii-yo m-re á.

16 Urege wan-gaan be-ur no zeeg wu, “Shir 'ye wo o-kwum. Shir 'ye wo rii-yo m-re un yo m-cop ne,” amba no 'ya wu yo wu cone á. Ay kaa o gu rii á.

17 Urege net shereg be-ur Yeso **Kiristi**, komo wu ro un nom un rii-yo ur-bon yo Shir cone á, sher-mo un wu, margan-mo m-sheer mo.

Be-de m-nom atte m-nap m-sheer

18 Komo wu ken wu wua zee, “Wo m-sheer ne, me m-senge ne.” Amba man shes wu, “Kutu me sher-m ru ba m-senge, man kutu wo sher-m re be-de un senge-m re.”

† **Bor-üş yoor:11 2:11** Hyen komo: Rwuu 20:14; Kara 5:18.

‡ **Bor-üş yoor:11 2:11** Hyen komo: Rwuu 20:13; Kara 5:17.

19 O nepste Shir gaan ye, kaane ro ur-bon ne!
Amba ko **ya-ut-kot** ye nak kaane, har ma ut-zap.

*Yo a m-nom à kutute
a m-sheṛ ne be-de Shir*

20 Wo ko-raag! ¿Ko wo un con m-moka um ruru
wo unze m-sheṛ ba m-senge hwaa o?

21 Gwot no **Ibrahi** tato na, remen senge-mo
un wu, Shir hyente wu kashi un net, remen wu
sekete wa un wu **Ishaku** be-de un **hana-o** ur-
seke.§

22 To, o hyanag bo sheṛ-m ro m-neke m-senge
ne à, komo sheṛ-mo un wu guug wu m-nom un yo
wu nome à komo senge-mo un wu shooste sheṛ-
mo un wu.

23 Kaane o a shoose Ma-to Shir to ro gense à
unze, "**Ibrahi** shereg be-de Shir, komo remen
sheṛ-mo un wu, Shir hwoog wu be-de un hun-
ne kashi."* Remen kaane hun-ne zette **IbrahiKo-**
nay-wu Shir.†

24 No hyanag, ay, net a warag ko-yan-ba-**ur-**
ba'as un co o Shir, remen senge-mo un wu, ba
remen m-sheṛ un hond un mo á.

25 Kaane o komo **Rahab**, ko-kaar. Remen un
senge-mo un wu, wu waragte kashi. Remen wu
wukute yan-seeg-o-bo, wu guug ye, ye ruug un yo
ken cow-yo un hon.‡

26 Remen kaane, bo wur-o un net-wu rotte o-
kukt á margan o, kaane o komo m-sheṛ ba m-
senge margan-mo.

§ **Bor-üş yoor:21 2:21** Hyen komo: Taka 22:1-14. * **Bor-üş
yoor:23 2:23** Hyen komo: Taka 15:6. † **Bor-üş yoor:23 2:23**
Hyen komo: 2Nom 20:7; Isha 41:8. ‡ **Bor-üş yoor:25 2:25** Hyen
komo: Josu 2:1-21.

Bor-us tet

Garamse ur-rem

¹ Or re ne, ba myet-m no depe ye warag ya-ur-yoos á. Bo no nape à, te ya-ur-yoos, Shir a piishi te ut-ma us-nu ne arge ko wu ke net-wu.

² Myet-m na o-da deen a m-ba'ase. Amba urege net ro m-ba'ase un yo wu ro m-zee á, wu ro o ka hond hond, komo wu ro m-hoks un dorutte un hoog-mo un wu.

³ Gwot no o-jok. A cune jok-yo nomo na o-dorotte, a yo m-ru'e o-hu un nu-o un yo, komo a yo m-hoks m-rwo yo dore so a cone à.

⁴ Gwot no hat-to m-sa no hyen, ko de totte ut-caari à, yo-mo m-'wons mo ro to m-nekette, myet un kaane ne un ko-o rek-yo atte-to m-nak, wa-m-nak o-hat wua hoks o m-mus komo ko ke co-se wu cone.

⁵ Kaane o rem-de un net ro, ur-rek-de de ro n-me un dok-to un wur-o un net, myet un kaane ne de ro m-rwunte caari-to ut-ma.

Gwot no bo ra o-rek o ro un hoks m-tuks un caari o-koj hwiki à!

⁶ Ai rem-de un net ra-o, shiishe de ro un rem-us yo-se! Ka rem-de ro un wur-o na, komo de ro un naas un net war war. Ur-rem tomso ne, de ro un saburse un net un myet cow-yo un hoog-mo un wu. Komo un den-o o-ra o ba m-ryomse a de m-puktune.

⁷ Ko-hun a hoks myet-mo ut-gut, un no-ne, un rii-ye ro ut-kurub, m-ja o-uub ne, un jan ne, ye nom yo wu cone ye nomo wu à.

⁸ Amba yatt net-wu he hoks un garamse rem-de un wu á. Ur-rem rii-de o-saa de rii-de ba ur-wuwe, komo de ro m-raab ne mo ur-ho.

⁹ Un rem-ur na atte un nome un Wan-Koyan, Tato na wu n-Ton ur-bongon. Komo un rem-ur na, atte un cep un gom-to un ba ur-bon, be-to un hun-ne ye Shir nome untun wu à.*

¹⁰ Un nu-o gaan atte ur-bongon un ka nu-o komo atte hun-ne ut-reeb. Or re ne yan-dor, yo ka rii-yo ur-bon yo á!

¹¹ Haw-ur gaan a hoks rwunte ho-mo m-rerem un mo ur-gaag ne á.

¹² Or re ne, 'yo-yo o-rum a hoks m-mat un yakar-ye ut-moore á, ko ne, 'yo-yo o-moore met yakar-ye o-rum á. Kaane komo du-de ro m-'ya un ho-mo m-por à, dea rwuunte ho-mo m-rerem á.

Nap-se o-nip

¹³ ¿Kõ ko-ya-us-weer us-nap ne ro kon be-ur no? Se wu kutu na be-de un she'et-de un wu de ur-bon, komo un senge-mo ur-bon ne mo wu ro m-nom à, n-me un gwugwer-mo ur-hi, mo a m-kum be-de weer-se Shir à.

¹⁴ Amba urege un hur-ur no, no ur-shoob, ut-yage ne, komo un con-to ur-hi ne, to yagu no us-ses, no m-zee no us-weer ne. Taase no yage ma-to o-nip.

¹⁵ Gon ka nap-se ba se ro m-kergune es-mo n-Ton à se á, se un hono o-dak se. Komo se barag-se ma-hun se, amba se un **ko-Gwomo-wu un ya-ut-kot** se.

* **Bor-uş tet:9 3:9** Hyen komo: Taka 1:26.

¹⁶ Remen ko_kene_no_hyane_ur-shoob, un con-to ur-hi ne, káne komo no he hyan m-dum, un gon ko se ke rem-uş yo-se ne.

¹⁷ Amba nap-se ro m-rwuun eş-mo un n-Ton à, un hon se ro. Net-wu ro un gon ka napse ne à, wu rott **ur-ba'as** un hoog-mo un wu á. Komo se ro m-hante she'et-de m-gwugwu, un ruş ur-hi ne, un hi-de m-gwugwer ne un hoge ur-'won ne, m-yar-ne, koos-m ro kon á ko o-shepe.

¹⁸ Bo un ye go ur-go un gwugwu-mo ur-hur be-de hun-ne à, yea ce men-ut pus-to be-de un Shir.

Bor-uş nass

*Con-to ur-hi ro m-hante
sune-mo ut-ma*

¹ ¿Ya ro m-hante sune-mo ut-ma m-dum ne be un no? Con-to ur-hi de ro be un no, de ro no m-dum, de ro no komo m-hante sune-mo ut-ma.

² No m-con un rii amba no kum á, remen kaane no hooru net. No un hoob un rii ja'ja, no taage m-kum, no senguru hoob-o m-dum un sune-mo ut-ma ne. Ai, no kum rii-yo no o-hoob á remen no ro m-kon be-de Shir á.

³ Tomso ne da-o no kone Shir, noa kum á remen no m-kon un hur-de un men-ut jaas-to ne. No m-con no hoge m-rerem un hon no.

⁴ Ya no ro untun ne'a-ne ye ro m-sheş be-de un campo un ye ne á. No nap unze no cune m-nom m-nay un rem-se un hono o-dak, no un yage-to Shir o ka à. Remen kap wu ro un con-to un rem-se hono o-dak à, wu muutte hi un de un wu, wan-yage-to Shir.

⁵ Taase no zee bo-to, Ma-to Shir to ro gense à unze, “**Kukt-o Shir** ya'e na à, o ro ur-shoob ne, o conog a she'et ba m-kukop.”*

⁶ Amba Shir ro na m-do'e un yar-mo un wu deen. O rwo'e Ma-to un wu zeet, “Shir ro m-yage un yan-nu-mo ur-hi. Amba wu ro m-deet un yan-ba-nu-mo ur-hi n-ton.”†

⁷ Remen kaane, she'et no un kus-o Shir no nome wu o-dorotte. No yage **ko-Gwomo-wu un ya-ut-kot**, wu ne wua som no.

⁸ Nom no yow yow un Shir ne. Wu ne wua nom yow yow un no ne. No ya-ut-**ba'as**, yagu no nom un rii yo-yo. No ya-o-shepe, jamas no hur un no, no muun be-de Shir.

⁹ Nom no tuk-mo ut-men, no rwunte m-yish. No nemes komo á, sengu no us-'won. Zak-o no komo o warag tuk-mo ut-men.

¹⁰ Gwereksu no ur-hi be-de un Wan-Koyan, wu ne komo wua deet no n-ton.

Wo dek or ru ko-ya-ur-ba'as á

¹¹ Or re ne yan-dor, no we or no ne á. Remen myet bo un wu we or un wu ko-yan-dor à, ko ne wu sawse wu ur-ba'as, wu ro un we un **karamsa**-o Shir o ka. Wu ro m-zee o rott ur-bon á. Wo zee komo yo Shir zee à yo rott ur-bon á, wo kus o ka m-nom un o-dorotte á. Komo o ba'asute be-de un muut un hi un du ko-yan-piish o ut-ma.

¹² Shir ye cot ro un rwo o-**karamsa**. Wu ro komo wan-piish ut-ma. Wu ro cot wan-Gwu,

* **Bor-üş nass:5 4:5** Hyen komo: Rwuu 20:5; 34:14; Zeka 8:2.

† **Bor-üş nass:6 4:6** Hyen komo: Swoo 3:34 (ut-Girik).

tomso ne wu ro ur-beeb ne wu hoot. Remen kaane, wo bo'os sawse un or ru **ur-ba'as** á.

No nom m-gwon un buk ne á

¹³ Raag no ut-to! No ye ro m-zee, "Ca ko m-buk ta neke un o ka bo-o re, te nom hak-o gaan, te ut-baab te su m-ho."

¹⁴ No kaane no nap yo he m-kor m-buk á. ¿Ya hoog-m no dosse ne? Ya hoog no ro sa o zee 'hye-de o-hund, de ro m-nom da-o gaan à, ujime se m-dosse.‡

¹⁵ Depete no zee, "Urege Wan-Koyan conog, urege komo te un hoog ne, ta nom kaane un kaane ne."

¹⁶ Amba no m-zee kaane á. No m-hyan ko yo ke rii-yo un kom-ut no yo ro, komo nomuru us-ses unze kaane yo ro. Ai, gon ka jaks ur-hi o rott ur-bon á.

¹⁷ Remen kaane, myet bo un wu nepse yo depe wu nom à, amba wu yage m-nom, wu ka **ba'as-de** wu ro m-nom un co-o Shir.

Bor-us taan

A nak ya-o-kwum ut-to

¹ Raag no ut-to no ya-o-kwum, 'won no remen swo un koob-de roonu no à.

² Kwum-o no deeste m-shebe, oa gu no rii á. Komo ren un kuks ne reese matuku-ut no.

³ Zinariya no un azorpa no ne ye no wuke à ye deeste m-shebe. Ka shebe-mo ye da à, mo Shir he m-hyan wu naastu no, mo he no m-re untu o-ra.

‡ **Bor-us nass:14 4:13-14** Hyen komo: Swoq 27:1.

Remen no wukute hwor, no morogsute hi un no o-kwum un ka da-o, ho-de piish ut-ma.*

⁴ No yagute m-top un ye nome no m-senge o-kat. No reeg ra-o un ye. Raag no ut-to, 'won-se un ye ro no m-ce un kat-ut no à, woog be-de Yawe wu jiishe ur-beeb à.†

⁵ No un hoge un rerem-mo un hoog-m no kane un hono o-dak. No re no su yo hoog-m no cone à. No ro m-nom un yo hur-ur no cone à, amba nap no unze Shir a 'ye yan-yage-to un wu ur-koob.

⁶ No piishite yan-ba-**ur-ba'as** ut-ma no ho ye. Komo ba ye un wen no.

Dungun no komo no kon Shir

⁷ Or re ne yan-dor, dungun no har Wan-Koyan muunte komo. Yoos no be-de un ya-tom. Ye ro m-dungune har da-o m-ce. Ye ro m-dungune deen un 'er-de un kem-o ur-go un o ur-buste ne da-o m-nen.

⁸ No ma she'et no, no dungune. No nom jaab-o ut-men, no waase Wan-Koyan na, remen muun-mo un wu nomsunte yow yow.

⁹ Or re ne, yagu no nome un or no ne us-hwumug. Taase Wan-Koyan piishi no ut-ma. Remen ko-yan-Piish ut-ma nomsunte yow yow m-muun ne, har wu ro ma un ish!

¹⁰ Or re ne, doru no bu-yo yan-rwor un Ma-to Shir. Ye nome ut-ma un jin-ur Wan-Koyan à, ye swoog ur-koob remen de komo ye dungune. Nom no untun ye.

* **Bor-üş taan:3 5:2-3** Hyen komo: Mati 6:19. † **Bor-üş taan:4 5:4** Hyen komo: Kara 24:14-15.

¹¹ Remen a zeeg, ka ye dungune har ur-kom à, Shir ya'ag ye ur-ho. No hogussute de gon dungune-m Ayoba, no nepse bo Wan-Koyan hu wu nu-o so-o ur-kom à. Remen Wan-Koyan ko-ya-m-it wu be-de un nom us-ryaab, ko-ya-ur-'won wu komo deen.‡

No jar no tond á

¹² Arge koyan, or re ne yan-dor, no jar o-jar no tond á. Da-o no m-swor o-nu à, no jar no tond n-Ton un shir á, ko un hono o-dak, ko un jin-de un yo ken rii-yo, no tond un de á. Urege no zeeg “Oho,” ess no “Oho.” Urege no zeeg “Ay,” ess no “Ay.” No esse kaane, Shir a piishi no ut-ma á.§

Bom no Shir no kon wu m-she ne

¹³ Urege wu ken wu ro un swo ur-koob, to, yage wu konot Shir gu wu. Urege wu ken wu be-ur no ro o-zak, to, yage wu sengute hu un sep-to ur-bongon.

¹⁴ Urege wu ken wu piishe be-ur no á, to, wu hoob sek-ye yan-dor ye Shir, ye konot Shir. Da-o us-kon, ye taame wu m-now un jin-ur Wan-Koyan.*

¹⁵ Gon ka kon o m-she o, oa taas gom-o un ka net-wu. Wan-Koyan a muut ka net-wu ba un gom, komo **ba'as-to** wu nome à, a sokse wu to.

¹⁶ Remen kaane, sengu no rwor un **ba'as**-ut no be-ur or no ne, no us-kon rem or no ne, remen a taasutu no gom-us no. Da-o kashi un net kone,

‡ **Bor-uş taan:11 5:11** Hyen komo: Ayub 1:21-22; 2:10; Bong 103:8. § **Bor-uş taan:12 5:12** Hyen komo: Mati 5:34-37.

* **Bor-uş taan:14 5:14** Hyen komo: Mark 6:13.

kon-se un ko-yan-men-ut pus-to ro ur-beeb ne deen.

¹⁷ **Ereja** net-wu untun na. O ken da-o reeno, wu wu kone be-ur Shir, taase a he kem un dak-o **Isra**. Komo a he kem un ka dak-o á, har hak-us tet un reng-us cind.[†]

¹⁸ Ka da-de komo wu konuru be-ur Shir na a he kem. Komo a heeru kem, komo hono o-dak ya'uru rii-yo m-re.[‡]

¹⁹ Or re ne, urege wu ken wu be-ur no yagute cow-yo Shir yo o-nip, komo wu ken wu be-ur no muunturu wu un cow,

²⁰ wua nept unze, ka wu muunte **ko-ya-ur-ba'as** be-de Shir à, wu guug hoog-o un ka net-wu be-de m-mar. Komo Shir a soks moor-to un **ba'as-to** un ka net-wu.[§]

[†] **Bor-us taan:17 5:17** Hyen komo: 1Gwm 17:1; 18:1. [‡] **Bor-us taan:18 5:18** Hyen komo: 1Gwm 18:42-45. [§] **Bor-us taan:20 5:20** Hyen komo: Swoo 10:12; 1Bit 4:8.

ut-Hun

The New Testament in the ut-Hun language of Nigeria

copyright © 2017 Wycliffe Bible Translators, Inc.

Language: ut-Hun

Contributor: WBT Central Zone

All rights reserved.

2025-07-09

PDF generated using Haiola and XeLaTeX on 26 Jul 2025 from source files
dated 9 Jul 2025

c0c13181-081b-50cb-89bb-9a36796100b2